

**ANG**

# Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XXXVII Blg. 16  
Agosto 21, 2006  
www.philippinerevolution.net

## Editorial

# Rehimeng bulok, bulaan at berdugo, dapat na ibasura

**W**alang singgarapal na namang ibinasura ng mga alipures ni Gloria Arroyo sa Kongreso ang kasong *impeachment*. Ni hindi na binigyan ng pagkakataon ang mga nagsampa ng kaso na basahin man lamang ang listahan ng napakaraming naihandang ebidensya ng pandaraya sa eleksyon, korapsyon at pamamaslang sa mga aktibista at iba pang mabibigat na krimen ni Arroyo. Basta na lamang pinatay ng mga kongresistang maka-Arroyo ang kaso dahil wala umano itong batayan.


Ang gayong walang pakundangang paglapastangan sa mga prosesong parlamentaryo at li-gal ay muling nagpapakita ng desperasyon ni Gloria Arroyo na kumapit sa poder. Sa pagbabasurang ito ng kasong *impeachment*, isinara na ng rehimeng Arroyo ang natitirang parlamentaryong prosesong inaasahan ng mamamayan sa ilalim ng kasalukuyang Kongreso para malantad ang mga kasalanan ng rehimen at mapalitan ito. Lalo lamang inilalantad ng rehimeng Arroyo ang sariling kabulukan, kasakiman at katusuhan, at lalo lamang nitong inihihiwalay ang sarili sa mamamayan. Bunga nito, lalong lumalapad ang hanay ng mamamayang naniniwalang wala ngayong ibang mapagpipilian kundi ang dalhin ang laban sa lansangan at sa arma-

dong paraan upang magwakas na ang di lehitimo, korap, papet at brutal na paghahari ni Gloria Arroyo.

Ang pagbasura sa kasong *impeachment* ay pinakahuli lamang sa mahabang serye ng maruruming maniobra at mararahas na atake sa mga pwersang lumalaban sa rehimeng Arroyo.

Kamay-na-bakal ang pangunahing sandigan ni Arroyo upang makapanatili sa poder. Sa pamamagitan ng malawakang pamamaslang at pagdukot sa mga aktibista, mga pinaghihinalaang rebolusyonaryo, iba pang mga kalaban sa pulitika at maging mga inosenteng sibilyan, naghahasik siya ng lagim sa desperadong tangkang paatrasin at durugin ang malawak na kilusan para patalsikin siya.

Lansakang nilalabag ni Arroyo at mga kasapangkat at alipures niya ang mga karapatang sibil sa pamamagitan ng mga pasistang hakbangin at kautusan tulad ng pagbabawal sa mga mapayapang pagkilos at pang-aaresto sa mga nagrurali. Marahas na nililimitahan at binubuwag ang iba't ibang pagkilos ng mamamayan. Ipinadudukot, ipinapapatay o kaya'y ginigipit at ikinukulong ang kanyang mga kalaban. Naghahari ang terorismo ng estado sa malawak na kanayunan at maging sa ilang sentrong bayan at syudad kung saan namamayani ang mga pangunahing pasis-



**Mga tampok sa isyung ito...**

**Super regions:  
Super-pantasya  
ni Arroyo** PAHINA 4

**Kleriko-pasistang  
doktrina ni Intengan** PAHINA 7

**Instrumento ng  
panghihimasok: Mga  
humanitarian mission  
ng US** PAHINA 12

tang galamay ni Arroyo.

Kaalinsabay, sagadsaring ginagamit ni Arroyo ang iba't ibang pagmamaniobra, pagpapaikut-ikot sa batas, baluktot na pangangatwiran at iba pang maruruming taktika upang tiyaking ang mga institusyon at rekursong sa ilalim ng kanyang kapangyarihan ay magsisilbi sa kanyang di lehitimong paghahari at tuluy-tuloy na pagpapakasasari. Lahat ng mahawakang rekursong guberno mula pambansa hanggang lokal na antas ay ginagamit upang maipilit ang Chacha (pagbabago ng konstitusyon) alinsunod sa disenyo ni Arroyo para makapagpalawig pa siya sa poder, masupil ang mamamayan at higit pang madambong ang bansa, kakutsaba ang kanyang imperyalistang amo.

Ginagamit ng rehimen ang lahat ng paraan upang pagtakpan ang katotohanan. Hinaharang nito ang lahat ng pagsisikap ng Senado na imbestigahan ang mga tampok na kaso ng katiwalian sa kabila ng pagkilala ng Korte Suprema sa kapangyarihan ng Senado na ipatawag sa mga pagdinig at imbestigasyon nito ang mga upisyal ng guberno.

Isa sa mga pinakahuling pagsi-

sikap ng Malakanyang na takpan ang katotohanan ang pagharang nito sa mga upisyal ng OWWA na inimbitahang humarap sa imbestigasyon ng Senado kaugnay ng nawalang pondong dapat ay ginagamit para sa pagpapalipas ng mga migranteng manggagawa sa Lebanon. Nariyan din ang kaso ng pagtatago kay Jocelyn "Joc-joc" Bolante at iba pang mga pangunahing sangkot sa katiwalian kaugnay ng mga pondong pang-agrikulturang ginamit sa kampanyang elektoral ni Arroyo. Sinusuhan din ng Malakanyang ang mga saksi sa iba't ibang krimen ni Arroyo at mga kasapakat niya upang bumaligtad at gawing inutil ang mga imbestigasyon dito.

Walang tigil ang paghahabi ng Malakanyang ng mga kasinungalingan para magpabango, takpan ang mga kabulukan at krimen nila, palabasing tama ang mali at suhayan ang mga buktot nilang plano.

Minamanipula ang mga estadistika upang pagtakpan ang padausdos na kalagayan ng ekonomya, ang dami ng mga naghihirap at walang trabaho at ang malalang pagkabangkarote ng guberno.

Habang walang habas na ipinatutupad ng rehimeng Arroyo ang patakaran ng paghahasik ng lagim sa pamamagitan ng tuluy-tuloy na armadong pang-atake sa mga aktibista at ordinaryong mamamayan, pilit nitong iniwasan ang kriminal na responsibilidad sa mga kaso ng pagpatay at pagdukot. Idinadawit pa nito ang mga armadong rebolusyonaryong pwersa sa mga krimeng ito sa pagsasabing ang mga pinaslang at dinukot ay biktima ng "purgahan" sa loob ng rebolusyonaryong kilusan. Sa harap ng pandaigdigang pagtuligsa sa pasismo ng rehimen, bagong pagkukunwari na naman ni Arroyo ang paghirang ng bogus na komisyon para imbestigahan umano ang mga krimeng ito.

May hangganan ang pandarahas, pananakot at panlilinlang ng rehimeng Arroyo. Habang pinatitindi nito ang terorismo at panlo-loko, lalo lamang nitong inilalantad ang sariling kabulukan, kabuktutan at pagkapasista. Lalo lamang lumalawak at tumitindi ang galit ng mamamayan at kagustuhan nilang mapataksik na ang rehimen.

Maging sa ibayong dagat, parami nang parami ang bilang ng mga organisasyon, simbahan, upisyal ng guberno at mga kilusan na bumabatikos sa walang pakundangang mga armadong atake ng mga



Taon XXXVII Blg. 16 Agosto 21, 2006

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

[www.philippinerevolution.net](http://www.philippinerevolution.net)

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: [angbayan@yahoo.com](mailto:angbayan@yahoo.com)

## Nilalaman

### Editorial

Lalong sumisidhi ang hangad ng bayan na ibagsak ang rehimen 1

Kasong *impeachment* laban kay Arroyo 3

Super-pantasya ni Arroyo 4

Bolante, ibalik sa bansa 5

### Pananalanta ng pasistang estado

Patuloy na paglabag sa karapatang-tao 6

Kleriko-pasistang doktrinang Intengan 7

Umuulan ang internasyunal na batikos 8

Mga opensiba sa Bikol 9

Mga tampok na opensiba sa Leyte 9

*Humanitarian mission* ng US sa bansa 12

**Balita** 14

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

Sundan sa "Editorial..." pahina 3

pasistang galamay ng estado sa mga aktibista at iba pang lumalaban sa gubyrno. Hindi na kapani-paniwala sa internasyunal na komunidad ang mga pagtatakip at pagsisinungaling ng rehimen. Dahil sa kumalat nang bahong ng gubyrnong ito bunga ng dumaraming mga pampulitikang pamamaslang at iba pang paglapastangan sa karapatang-tao, ang pangalan ni Gloria Arroyo ay itinatumbas na sa pinakamalulupit na pasistang diktador sa kasaysayan tulad nina Marcos, Pinochet at Hitler.

Malaking pagkakamali ng rehimen ang pagsasara nito ng iba't ibang mga daluyang parlamentaryo at iba pang mapayapa at ligal na protesta. Nangangarap ito nang gising sa pagsasabing sawa na ang mamamayan sa paglaban at pagmamartsa sa lansangan. Hindi nagsawa ang mamamayang Pilipino sa 14 na taong pakikibaka sa diktadurang Marcos sa lansangan man o kabundukan. Kalauna'y nagtagumpay silang patalsikin ang kamuhi-muhing diktadura.

Muli itong pinatutunayan ng mamamayang Pilipino: Sa kabila ng malupit na panlulupig at pagsisinungaling ng bulok at brutal na rehimeng Arroyo, patuloy na susulong at iigting ang pakikibaka ng mamamayan para tuluyan nang mapatalsik at maparusahan ang rehimen. Kasabay ng pagdagsa ng nagngangalit na mamamayan sa lansangan, ibayong susulong ang rebolusyonaryong armadong pakikibaka upang tuluyan nang ibagsak ang rehimeng Arroyo at kamtin ang malalaking pagbabago sa lipunan tungo sa pagkakamit ng tunay na pambansang kalayaan, demokrasya at kaunlaran.


AB

## Ibinasura ng Committee on Justice ng Kongreso

### Kasong *impeachment* laban kay Arroyo

**K**ara-karakang ibinasura nitong Agosto 16 ng Committee on Justice ng Kongreso ang kasong *impeachment* laban kay Gloria Arroyo. Sa botong 56-24, muling isinara sa taong ito ang natitirang prosesong parlamentaryo para mailantad at mapatunayan ang mabibigat na krimen at papanagutin sa mga ito ang pasista, korap at pekeng pangulo.

Sa ibinasurang kasong *impeachment*, si Gloria Arroyo ay pinararatan ng paglabag sa konstitusyon, katiwalian at pang-aabuso sa katungkulan. Nilaman ng *impeachment complaint* ang 22 partikular na kaso kabilang ang pandaraya sa eleksyon, mga paglabag sa karapatang-tao at asasinasyong pulitikal at pagtanggap ng suhol sa hwenteng.



Iginiit ng mga maka-Arroyong kongresista na "kulang sa batayan" ang kasong *impeachment* laban sa pangulo gayong hindi pa nababasa kahit ang listahan man lamang ng kahon-kahong mga ebidensya sa mga kaso laban kay Arroyo. Kabilang dito ang pitong kahon na naglalaman ng mga dokumento ng mga *bank account* ni Arroyo sa ibang bansa, mga teyp, bidyo, testimonya ng mga saksi at iba pa.

Sadyang garapalan ang ginawang pambubusang Committee on Justice, na kinabibilangan ng mga kongresistang kilalang nakinabang sa P728 milyong "fertilizer scam" na pangunahing kinasasangkutan ni Arroyo at laman din ng reklamong *impeachment*. Wala ring delikadesang tumanggi ang anak ni Arroyo na si Rep. Mikey Arroyo na ipwera ang sarili sa mga pagdinig.

Sa kamay ng nakalalamang na bilang ng mga bayaran ni Arroyo, tiyak na ring tuluyan nang ililibing ang kasong *impeachment* sa plenaryo ng Kongreso sa Agosto 23.

Dahil sa magaspang na paglapastangan sa prosesong *impeachment*, lumalawak ngayon ang panawagan para sa mga pagkilos sa lansangan at *civil disobedience*. Kabilang si Archbishop Cardinal Ricardo Vidal sa mga taong-simbahan na nananawagan ng pagkilos sa lansangan.

AB

"Super-region" at iba pa

## Super-pantasya ni Arroyo

**M**ay bago na namang pantasyang inilalako si Gloria Arroyo. Aniya sa kanyang ikaanim na State of the Nation Address (SONA), makakamit na raw ng Pilipinas ang katayuang First World—tulad ng US—sa loob lamang ng 20 taon sa pamamagitan ng inilarawan niyang mga "super proyekto."

Kung tutuusin ay wala namang ginawa si Arroyo kundi hatiin ang kapuluan sa apat na tumpok na binansagan niyang mga "super-region" o "mega-region": may isa sa hilagang Luzon, may isa pang sumasaklaw mula Central Luzon hanggang Southern Tagalog, isa pang sumasaklaw sa Bicol at Visayas, at panghuli ang sumasaklaw sa Mindanao. Ang mga ito ay alagayang daw niya ng mga proyekto ng imprastrukturang susi sa pagkakamit ng kaunlaran at paglutas sa kahirapan.

Nagulat na lamang ang ibang mga upisyal na nangangasiwa sa ekonomya dahil marami sa ihinanay na mga proyekto ni Arroyo ay tapos na o kaya'y nasa proseso na ng pagtatapos, pero pinalalabas na kabilang sa mga bago niyang "super proyekto". May iba namang di pa man napagpaplanuhan. May mga planong di lamang sobrang mahal kundi maraming pinsalang idinudulot sa mamamayan, tulad ng pagpapalawak ng San Roque Multipurpose Dam. Marami ring walang batayan at di makatotohanan, tulad ng pinalalabas ni Arroyo na potensyal ng Ilocos at Cordillera para magsuplay ng isda sa bansa samantalang kumpara sa ibang lugar sa Pilipinas ay salat ang isda roon.

Higit sa lahat, pinakamalaking palaisipan sa mga ekonomista ng gubyrno kung saan kukunin ng bangkaroteng rehimeng Arroyo ang tinatayang P372 bilyon hanggang mahigit P1.7 trilyong kakailanganin para sa mga "super proyekto" ito. Ni hindi nga nailunsad

ng gubyrno ang sensus na dapat na isinagawa noon pang 2005 dahil sa kakulangan ng pondo.

Hindi na rin gaanong makaaasa ang gubyrno sa ayuda ng mayayamang bansa. Dahil sa kabiguan ng gubyrno na magpalitaw ng katumbas na

pondo, non pang 2003 ay kinansela

na ng Japan Bank for International Cooperation (dating Japan Overseas Economic Cooperation) ang inilaan nitong "official development assistance" (ODA), kaya nakatiwangwang ang 11 proyektong nagkakahalagang P24 bilyon.


Sa tindi ng krisis sa ekonomya ng bansa, ang tanging mapagkukunan ngayon ng rehimen ng pondo para sa mga "super proyekto" nito ay ang dagdag na pangungutang sa mga internasyunal na usurero na humihigop na ng 80% ng ating pambansang produksyon sa anyo ng bayad-utang at dagdag na buwis

na maipapataw sa mamamayan.

**Ang tunay na kalagayan ng bansa.** Habang nagpapantasya si Arroyo, nakalugmok naman ang mamamayang Pilipino sa matinding kahirapan.

Ipinakikita ng pinakahuling sarbey ng Ibon Foundation (Hunyo 28-Hulyo 7) na lalong dumami at umaabot na sa 69.3% ang mga Pilipinong nagsasabing sila ay naghihirap. Umaabot na sa 43% ang walang trabaho o kulang ang kita. Kulang na kulang ang P300 minimum na arawang sahod sa P675.54 kada araw na kinakailangan ng isang anim-kataong pamilya para mabuhay nang disente. Samantala, 75% ng mga negosyo ang humihingi mula sa Department of Labor and Employment ng eksemplasyon sa pagpapatupad ng batas sa minimum na pasahod dahil wala silang kakayahang ibigay ito. Salik ito sa pangingibang-bansa ng mahigit 3,000 Pilipino bawat araw para donon maghanap ng mapagkakakitaan.

Marami rin sa ginamit na batayang estadistika ni Arroyo ay pangawang mga kasinungalingan. Halimbawa nito ang pahayag niyang tumaaas nang 30% ang kita ng pinakamahihirap na pamilya. Taliwas dito, bumaba ang pangkalahatang kita ng mga pamilya nang halos 13%. Sa pinakamahihirap na pamilya, bumagsak pa ito nang karagdagan 4%. Hindi rin totoo na bumaba na ang bilang ng mamamayan na dumaranas ng kahirapan. Kahit sa minanipulang datos ng gubyrno, umaabot lamang sa 3% ng mamamayan ang bahagyang bumuti ang kabuhayan. Ayon sa Ibon Foundation, "Anumang pambabaluktot ng mga estadistika at mga pantasya ay di makapagkukubli ng ka-



Sundan sa "Fantasya..." pahina 5



# Kagyat na pagbabalik kay Bolante sa bansa, iginigiit

Iginigiit ng Senado, ligal na oposisyon at ng iba't ibang sektor ang kagyat na pagpapabalik mula sa US kay Jocelyn "Joc-joc" Bolante, dating Undersecretary ng Department of Agriculture (DA), upang harapin ang kaso ng pandarambong na isasampa laban sa kanya sa Office of the Ombudsman.


Mahigit isang buwan nang nakakulong si Bolante sa US. Inaresto siya noong Hulyo 7 paglapag niya sa paliparan ng Los Angeles, California sa hindi pa inililina na mga dahilan. Nagtakda ang korte sa US ng pyansang \$100,000 (P5 milyon).

Sa payo ng mga upisyal ng rehimeng Arroyo, hindi nagpyansa si Bolante at sa halip ay nagsampa ng petisyon para sa *asylum* upang umiwas sa deportasyon at mapalawig ang pananatili sa US hanggang limang taon at sa gayon makaiwas na mapabalik sa Pilipinas para direktang maimbestiga at makasuhan

siya ng pandarambong. Idinadahilan niyang plano raw siyang patayin ng Bagong Hukbong Bayan, katawa-tawang bagay na agad na pinabulaanan ng BHB.

Nagsampa ng petisyon ang mga abugado at eksperto ng UP College of Law laban sa kahilingan ni Bolante na bigyan ng *asylum*. Inililina nila na tumakas si Bolante sa Pilipinas dahil sa mga kaso ng korapsyon at hindi dahil sa pulitikal na panggigipit o paniniwala.

Alinsunod sa rekomendasyon ng



Senado, nakatakdang sampa-han ng kasong pandarambong sa Office of the Ombudsman sina Bolante at ang noo'y DA Secretary na si Luis "Cito" Lorenzo kaugnay ng mga iligal na transaksyon at pangungurakot sa P728 milyong pondo na pambili dapat ng abono at iba pang gamit pansaka.

Ayon sa imbestigasyon ng Senado, ginamit ni Arroyo ang pondong ito upang suhulan ang mga kongresista at lokal na pulitiko para suportahan ang kanyang kampanya sa pagkapresidente noong 2004. Tinukoy sa imbestigasyon ng Senado na si Bolante ang pinakaopereytor ni Arroyo sa operasyong ito. **AB**

## "Pantasya..." mula sa pahina 4

totohanang tungkol sa tunay na buhay-pang-ekonomya ng bansa at ng mamamayan nito."

Sa kanyang sermon sa misa matapos ang SONA ni Arroyo, pinabulaanan din ni Bishop Antonio Tobias ng Novaliches ang di makatotohanang mga pahayag ng pekeng pangulo. Gamit ang sarbey ng Social Weather Station, sinabi ng obispo na 66.7% ng mga Pilipino ay di na makabili ng sapat na pagkain; 64% ang hirap nang makabayad ng kuryente, tubig at iba pang serbisyo; 63.7% ang hirap nang makapagbayad ng matrikula ng kanilang mga anak; at 62.5% ang wala nang kakayahang magpagamot o bumili ng gamot. Pinasinungalingan din niya ang sinabi ng Malakanyang na 11% na lamang ang walang trabaho. Aniya, mahigit pa sa 16% ang walang trabaho at mas malaki pa ang bilang ng mga kulang ang hanapbuhay. Binatikos din ng obispo ang malaking panloloko ng guberno nang ibaba nito ang tinatawag na "sukatan ng kahirapan" mula sa P53 bawat araw tungo sa P34 kada araw. Ang kumikita ng mahigit P34 bawat araw, ayon kay Arroyo, ay hindi na maituturing na mahirap. Tinukoy din ng obispo ang problema ng napakabigat na pasanang utang ng bansa at kawalan ng tunay na pang-ekonomyang pag-unlad. **AB**

## "Super-korapsyon"

**W**ala mang malinaw na maaasahan ang mamamayan sa mga "super-region" at "super project" na pakana ni Arroyo, di maipagkakaila ang malaking biyayang tiyak na tatamasahin mula rito ng mga Arroyo at mga taga-Malakanyang, gayundin ng mga kroni at malalapit na kaibigan ng pamilyang Arroyo at mga galamay nila sa Kongreso, sa pambansa at lokal na pamahalaan at sa AFP at PNP.

Ang pakanang "super-region" ay mangangahulugan ng paglalagay ng isa na namang di kinakailangang suson sa pagitan ng pambansa at lokal na bukrasya. Magsisilbi lamang itong daluyan ng pondo na kukurakutin ng mga upisyal, bukod pa sa pagtitiyak na mailalaan ang pinakamalalaking bahagi para sa Malakanyang at mga alipures ni Arroyo. "Super-korapsyon" ang ibubunga ng pakanang "super region."

Sinasakyan ng pasistang militar at pulisya ang pakanang "super-region" sa layon nilang higit na supilin ang mamamayan. Ayon sa hepe ng AFP na si Gen. Hermogenes Esperon, ambag ng AFP at PNP kaugnay ng mga "super-region" ang pagtitiyak ng "seguridad sa kapaligiran" para maging matiwasay ang mga mamumuhunan dito. **AB**



# Karapatang-tao, patuloy na nilalapastangan ng rehimen

**W**alang habas ang ginagawang pang-aatake ng reaksyunaryong militar sa mga lider at myembro ng mga militanteng grupo laluna sa Central Luzon. Sa kabila ng malawakang pagbatikos sa mga paglabag sa karapatang-tao, patuloy ang walang rendang atake sa mamamayan ng mga sundalo sa ilalim ng kumand ni Maj. Gen. Jovito Palparan, Jr.

**Agosto 17.** Pinagmamarkahan ng ekis na pula ng mga elemento ng 69th IB ang pinto ng bahay ng ilang kasapi ng Kadamay sa Bala-ba, Dau, Mabalacat, Pampanga.

**Agosto 16.** Pinatay si Julie Vasquez, tserman ng Kilusang Magbubukid ng Pilipinas sa Nueva Ecija at kagawad ng barangay sa Culong, Guimba. Pinagbabaril siya bandang alas-9 ng gabi habang nakikipaglamay sa isang namatay na kaibigan sa isang bahay malapit sa detatsment ng 71st IB sa Culong. Kamakailan ay maring binatikos ni Vasquez ang mga pang-aabusong militar sa prubinsya at ang sapilitang pagpapakuha ng sedula sa mga taumbaryo. Labinlimang bala ng M16 at kal .45 ang umutas sa katawan ni Vasquez.

Noong araw ding iyon ay pinagbabaril hanggang sa mapatay si Danilo de Leon, isang drayber ng traysikel, sa Barangay Sukol, Calumpit, Bulacan. Pinaghinalaan siyang tagasuporta ng BHB.

**Agosto 15.** Pinaslang ng dalaawang armadong lalaki si Orlando Rivera, 40, sa loob ng kanyang tahanan sa Barangay Binuangan, Obando, Bulacan bandang alas-2 ng madaling araw. Nagtamo ng tatlong tama ng bala ang biktima. Kasapi si Rivera ng Pamalakaya sa Obando.

Pininturahan din ng ekis ng mga pinaghihinalaang elemento ng militar ang pintuan ng mga bahay nina Sonny de Armas, tagapangulo

ng Pamalakaya-Obando at kapatid niyang si Ricardo de Armas. Noong isang taon pa pinaghahanap ng militar ang magkapatid. Binatikos ng Pamalakaya ang pagsasama ng 10 kasapi nito sa Obando sa *order of battle* o talaan ng mga papatayin ng mga alipures ni Palparan.

Samantala, sa Barangay Iba Este, Calumpit, Bulacan, pinagbabaril hanggang sa mapatay si Sydney Santos, 30, na pinararatangan ng militar na sumusuporta sa BHB.


**Agosto 10.** Pinaslang si Gilbert Jamile, 40, ng Sityo Buntog, Barangay Canlubang, Calamba City habang nakasakay sa kanyang motorsiklo kasama ang kanyang bayaw. Pauwi sila noon mula sa Storck Phil. kung saan nagtatrabaho si Jamile. Si Jamile ay *board member* at organisador ng Samahan ng Magsasakang Nagkakaisa sa Buntog (Samana-Buntog), kapatid na organisasyon ng KMP.

**Agosto 8.** Nasa malubhang kalagayan ngayon sa ospital si Patricio Manahan, 32, myembro ng Bayan Muna matapos siya pagbabarilin sa Barangay Panasahan, Malolos, Bulacan. Naghahapunan ang mag-anak nang makarinig ng putok sa labas ng kanilang tahanan. Nang

kanila itong siyasatin ay pinagbabaril sa tapat mismo ng kanyang bahay si Manahan. Tinamaan siya sa leeg, katawan at binti.

**Agosto.** Laganap sa Nueva Ecija ang mga abusong militar kaakibat ng pag-oobliga ng AFP sa lahat ng mamamayan na kumuha at palaging magdala ng kanilang mga sedula. Isang 30 anyos na empleyado ng gobyerno na napadaan sa tsekpoyn ng Philippine Army at nakalimot ng kanyang sedula sa bahay ay pinauwing nakahubad bilang parusa sa kanya. Ipina-kain naman sa isang tindera ang dala-dala niyang sedula dahil luma na ito. Ganoon rin ang sinapit ng isang tserman ng barangay na luma rin ang dalang sedula. Sinampal at sinuntok sa tiyan ang isang matandang babaeng pulubi nang tanungin niya sa mga sumisitang sundalo na "Pati ba naman ako, kailangan ng sedula?"

Magtatatlong linggo na ring nagpapatupad sa mga bayan ng Nueva Ecija ng *curfew* mula alas-9 ng gabi hanggang alas-4 ng madaling araw. Nagbabahay-bahay din ang militar na may dalang listahan umano ng mga sumusuporta sa BHB. Binibilang din nila ang mga plato sa bahay at pinararatangang nagpapakain ng mga Pulang mandirigma ang pamilya kapag sobra sa bilang ng pamilya ang kanilang mga pinggan.



AB

# Kleriko-pasistang doktrina ni Intengan

Isang tahasang pasistang ideolohiya ang nasa likod at ibayong nagtutulak pa ng mga pamamaslang, pagtortur, pagdukot at pagpatay sa mga aktibista at mga pinararatangan ng militar na sumusuporta sa rebolusyonaryong kilusan. Hinuhubad na nito ang mga demokratikong pakitang-tao ng papet na republika at inilalantad ang pinakasaligang kailasan ng reaksyunaryong estado bilang isang marahas na instrumento ng reaksyunaryong makauring paghahari.

Ito ang linyang itinataguyod ni Fr. Romeo Intengan, kleriko-pasistang "religious adviser" ni Gloria Arroyo, tagapagtatag ng PDSP (Partido Demokratiko Sosyalista ng Pilipinas), isang sagad-sagarang anti-komunistang grupong gumagamit lamang ng pangalang sosyal-demokratiko. Kapartido at kakambal siya sa ideolohiya ng kasalukuyang National Security Adviser ni Arroyo at Chairman ng PDSP na si Norberto Gonzales. Mahigpit ang kaugnayan at pakikipagkutsabahan ng dalawang ito sa Central Intelligence Agency ng US. Si Fr. Intengan ngayon ang nagsisilbing pang-ideolohiyang gabay at guro ng rehimeng Arroyo at ng mga armadong pwersa nito sa pagsasakatuparan nila ng tolong-largang pasistang pananalakay sa mamamayang Pilipino.

Pinagsalita kamakailan si Intengan sa harap ng National Defense College, mataas na paaralan sa Pilipinas para sa mga usaping militar at seguridad, upang ilahad ang pang-ideolohiyang batayan at katwiran sa isinasagawang walang pakundangang mga pamamaslang at todong karahasan ng mga armadong pwersa ng estado laban sa mamamayang Pilipino. Ayon sa buktot na pasistang pagmamamati ni Intengan, sa ilalim ng internasyunal na makataong batas,

kailangang ituring ng AFP bilang mga "kombatant o tumatangan ng pwersa" hindi lamang ang mga mandirigma ng Bagong Hukbong Bayan (BHB) kundi maging ang laksa-laksa hanggang daan-daan libong sumusuporta sa armadong rebolusyon. Aniya, di man armado, mga tagong myembro pa rin sila ng mga milisyang bayan at kwerpo sa pagtatanggol-sa-sarili ng rebolusyonaryong kilusan.


Ang doktrinang ito ni Intengan ang pinakaubod ng lahat ng sanga-sangang buhong na gawain ng reaksyunaryong militar—lantaran man o sa pamamagitan ng mga kinokontrol nilang sikretong "death squad"—mula sa ginagawang pagdukot, *saturation drive*, pagpataw ng awtoridad ng militar at paghahasik ng lagim ng terorismo.

Ito ang pinakadiwa ng Oplan Bantay Laya ng AFP at maitim na inspirasyon sa likod ng uhaw-sa-dugong pasistang pananalasa ni Maj. Gen. Jovito Palparan sa Central Luzon at ng AFP sa iba't ibang bahagi ng bansa.

Halos 730 nang mga aktibista ang pinatay sa ngalan ng doktrinang ito ni Intengan at libu-libo pa ang biktima ng iba't ibang anyo ng karahasang militar at paglabag sa karapatang-tao.

Katulad ng imperyalismong US, tahasang binabaluktot ng Doktrinang Intengan ang lahat ng establisadong alituntunin at makataong batas sa kondukta ng digmaan. Taliwas sa hangarin ng internasyunal na makataong batas na pangalagaan ang mga sibilyan at mga pwersang hindi sangkot sa digmaan, walang ginagawang pag-iiba ang Doktrinang Intengan sa mga armadong pwersa at sa mamamayang walang armas.

Ang Doktrinang Intengan ay isang doktrina ng karuwagan at karahasan. Sa gabay ng doktrinang ito, ang mga baril ng mga sundalong AFP ay itinututok, hindi sa mga armadong katunggali nito, kundi sa mga aktibista at karaniwang mamamayan. Isa itong doktrina na walang patutunguhan kundi ang lalo pang pagdanak ng dugo ng mamamayang Pilipino. Subalit taliwas sa hangarin nilang makapaghasik ng takot, ang pag-agos ng kanilang dugo'y didilig sa galit, tapang at determinasyong lumaban ng mamamayang Pilipino. **AB**





"All-out war" ng rehimeng US-Arroyo

## Inuulan ng internasyunal na batikos

**P**atuloy na inuulan ng batikos ang kampanya ng malawakang pamamaslang at pagdukot ng papet at pasistang rehimeng Arroyo mula sa mga internasyunal na organisasyong nagtatanggol sa karapatang-tao, mga taong simbahan, organisasyon ng midya at maging ng mga kaalyado nito sa labas ng bansa. Pinatitingkad nito ang lalong pagkakahiwalay ng rehimeng Arroyo sa internasyunal na komunidad. Ang mga pahayag at pakikidalamhati ng mga dayuhang organisasyon at institusyon ay nagbibigay ng lakas at inspirasyon sa mamamayang Pilipino upang higit pang makibaka para mapatalsik si Arroyo.

Ayon sa Amnesty International sa ulat nitong Agosto 15, dapat mahiya ang rehimeng Arroyo sa kabiguan nitong pangalagaan ang buhay ng mga Pilipino at sa kawalan nila ng kalayaang magpahayag at mag-organisa. Binigyang-pansin ng AI ang pagdami taun-taon ng mga kaso ng paglabag sa karapatang-tao sa ilalim ng rehimeng Arroyo.

Tinukoy ng AI na marami sa mga pinapaslang ay mga aktibista at myembro ng mga progresibong partido at organisasyon na mapayapang kumikilos sa balangkas ng kasalukuyang sistema. Tinarget sila dahil sa akusasyon ng AFP at ng rehimen na mga myembro o tagasuporta sila ng Partido Komunista ng Pilipinas (PKP). Dapat umanong ikahiya ng rehimeng Arroyo ang kawalan ng mga karapatan sa malayang pamamahayag at pagkilos ng mamamayan dito.

Bukod sa panukala ng AI na muling buksan ang usapang pangkapayapaan, iminungkahi rin nito ang pag-iimbata sa bansa ng UN Special Rapporteur on Extrajudicial Executions, ng Special Representative on Human Rights Defenders at mga kinatawan ng Working Group on Arbitrary Detention.

Bago ito, nanawagan ang Philippine National Red Cross-Intern-

tional Humanitarian Law Committee (PNRC-IHLC) na itigil na ang "all-out war" ng rehimeng Arroyo laban sa BHB at lahatang-panig na galangin ang internasyunal na makataong batas.


Iginiit naman ng United Metho-

dist Church-USA sa gubyernong Arroyo nitong Agosto 17 ang pagsasagawa ng imbestigasyon sa mga kaso ng pagpaslang laluna sa mga taong simbahan. Sa 18 pinaslang na mga lider ng simbahan sa naka-raang dalawang taon, 15 ay mga kasapi ng UMC. Kasabay nito, naglabas din ng pahayag ang mga lider ng mga simbhang kumakatawan ng iba't ibang sekta mula sa lahat ng mga kontinente ng mundo. Hiwalay pang nanawagan ang United Church of Australia para sa katulad na imbestigasyon.

Hindi naman tiwala ang Asian Human Rights Commission (AHRC) sa itinakda ni Arroyo na dedlayn para sa paglutas ng mga kaso ng pamamaslang. Hindi ito seryoso, anang AHRC, at kulang ito para maharap ang malalang problema ng mga pampulitikang pamamaslang.

Kasabay nito, minaliit ng Reporters Sans Frontieres (RSF), internasyunal na organisasyon ng mga mamamahayag ang pagmamahayag ng rehimen dahil lamang nakapagtukoy ito ng ilang mga suspek at nakapagsampa ng ilang kaso kaugnay ng pagpaslang sa dalawang kagawad ng midya.

Samantala, tinukoy ng International Peasant Solidarity Mission (IPSM) na mga elemento ng militar ang nasa likod ng mga kaso ng paglabag sa karapatang-tao sa bansa. Ang pahayag na ito ay batay sa mga resulta ng *fact-finding mission* na isinagawa ng IPSM noong Agosto 6 at 8 sa pakikipagtulungan sa Kilusang Magbubukid ng Pilipinas, Asian Peasant Institute at Tanggol Magsasaka.





## Ipatupad ang CARHRIHL—Red Cross, AI

**I**nirekomenda ng Amnesty International (AI) at Philippine National Red Cross (PNRC) sa dalawang magkahiwalay na pahayag ang mahigpit na pagsasakatuparan sa Comprehensive Agreement on Respect for Human Rights and International Humanitarian Law (CARHRIHL).

Ayon sa AI, susi ang CARHRIHL sa pagharap sa mga pang-aabuso at paglabag sa karapatang-tao sa panahong walang tigil-putukan sa pagitan ng GRP at rebolusyonar-

yong kilusan. Gayunpaman, kinikilala ng AI na hindi naabot ang lubos na potensyal ng CARHRIHL dulot ng kawalang-istabilidad ng usapang pangkapayapaan. Pinuna rin nito ang panghihimasok ng US at EU nang ibilang ng mga ito ang PKP at BHB sa talaan ng mga “dayuhang teroristang organisasyon” na umapekto sa usapang pangkapayapaan.

Ayon naman sa PNRC, sapat ang mga probisyon ng CARHRIHL upang matiyak ang mahigpit na

pagpapatupad sa mga internasyunal na makataong batas ng dalawang panig ng digma.

Malugod na tinanggap ng NDFP ang mga rekomendasyon ng AI at PNRC. Nagpahayag ito ng kagustuhan at kahandaang makipag-usap sa rehimeng Arroyo.

Bago ito, nagpanukala ang NDFP ng pagbubuo ng independyenteng komite para magsagawa ng imbestigasyon sa dumaraming kaso ng *desaparecidos*, subalit tinanggihan ito noon ng GRP. **AB**

## Mga dinukot, ipinalilitaw sa AFP

**I**niutos ng Korte Suprema sa AFP at mga upisyal-ipanseguridad ng gubyerno na ilitaw ang kinatawan ng NDF-Bicol na si Rogelio Calubad, ang anak niyang si Gabriel at si Philip Limjoco. Gayundin sina Prudencio Calubid at kanyang asawa na si Celina Palma, Leopoldo Ancheta, Roland Porter, Ariel Beloy at Gloria Soco. Ang mga kautusan ay inilabas nitong Agosto 17 at 18 bilang tugon sa mga petisyon ng mga kamag-anak ng mga *desaparecido* para sa *writ of habeas corpus*. Ang paglilitaw kina Calubad ay iniutos ng Korte Suprema sa matataas na upisyal ng AFP, kay National Security Adviser Norberto Gonzales at Defense Secretary Avelino Cruz.

Katulad ng inaasahan, itinanggi ng mga upisyal ng AFP na hawak nila ang nawawalang mga aktibista. Bago ito, itinanggi rin ng AFP na hawak nila sina Karen Empeño at Sherlyn Cadapan, dalawang estudyanteng dinukot ng mga elemento ng 7th IB sa Hagonoy, Bulacan noong Hunyo 26. Nauna nang kinatigan ng korte ang petisyon para sa *writ of habeas corpus* ng pamilya ng mga dinukot na estudyante.

Samantala, ipinagmalaki ng Task Force Bulacan noong Hunyo 26 na may nadakip daw silang dalawang babaeng myembro umano ng Bagong Hukbong Bayan na pinangalanan nilang Ka Siera at Ka Tanya. Inulit pa ito ni Maj. Gen. Jovito Palparan sa telebisyon sa sumunod na linggo. Tumungo ang mga pamilya at abugado nina Empeño at Cadapan sa kampo ng Task Force Bulacan upang hanapin at kilalanin ang dalawang babaeng Pulang mandirigma ngunit wala silang nadatnan doon. **AB**

## Komisyon ukol sa pamamaslang, binatangos

**P**eke at pantapal lamang—ito ang reaksiyon ni NDFP Senior Consultant Jose Ma. Sison sa naiulat na panukala ni Gloria Arroyo na magbubuo ng espesyal na komisyon na mag-iimbestiga sa mga pampulitikang pamamaslang sa bansa. Magiging daluyan lamang ito ng mga malisyosong pahayag ng rehimen laban sa mga biktima, ligal na oposisyon at sa rebolusyonaryong kilusan dahil nakaasa ito sa mga hungkag na imbestigasyon ng mga ahen-teng pulis ni Arroyo, ani Sison. Gayundin, gusto nitong balewalain ang sariling Commission on Human Rights na matagal nang nananawagan para papangutuin ang rehimen.

Minaliit din ni Sen. Consuelo “Jamby” Madrigal ang komisyon. Tinawag niya itong “arogante at wala sa lugar.” Sa halip, aniya, dapat payagang mag-iimbestiga ang mga eksperto sa karapatang-tao mula sa United Nations at muling buuin ang Joint Monitoring Committee on Human Rights na sumusubaybay sa implementasyon ng CARHRIHL. Iginiit ni Madrigal na dapat bigyan ng rehimen ng danyos ang mga pamilya ng mga biktima, tigilan na ang “all-out war” at tanggalin si Maj. Gen. Jovito Palparan.

Samantala, nagbubukas ang BAYAN at iba pang mga organisasyong target ng mga pamamaslang na makipagtulungan sa komisyon alinsunod sa ilang kundisyon, subalit di nawawala ang kanilang pagdududa na may makabuluhan itong makakamit. **AB**



## Mga taktikal na opensiba sa Bicol

Sinalakay ng BHB ang isang detachment ng CAFGU sa San Jose, San Vicente, Camarines Norte nitong Agosto 9. Nakasamsam ang mga Pulang mandirigma ng isang M60 masinggan, isang M16, isang M14, isang karbin, isang kalibre .45 pistola at iba pang gamit militar.

Samantala, hindi ginalang ng Armed Forces of the Philippines (AFP) ang idineklarang tigil-putukan ng BHB sa paligid ng Mayon nang salakayin ng mga pwersa ng 9th Infantry Division ang isang yunit ng Bagong Hukbong Bayan (BHB) noong Agosto 16 sa Sua, Malinao, Albay. Ang barangay na ito ay nasa saklaw ng 15-kilometrang erya sa paligid ng nag-aalburutong bul-

kang Mayon kung saan nagdeklara ng tigil-putukan ang National Democratic Front-Bikol.

Sadyang iniwasan ng BHB na makaengkentro ang mga sundalong nagpapatrulya sa erya subalit tinugis pa rin sila ng mga ito. Napilitan ang mga gerilya ng BHB na lumaban para ipagtanggol ang kanilang sarili at dagliang makalayo sa atake ng kaaway.

Ipinakikita nito ang kabulastugan ng sinasabi ng 9th ID na naroon ang mga pwersa nito para tumulong sa *relief and evacuation*. Inamin mismo ng 9th ID dito na hindi nila nirerespeto ang tigil-putukan ng NDF-Bikol at wala silang intensyon na tumbasan ito.

Bago ito, nagkoro sa pagsisinu-


ngaling ang 9th ID, pambansang pamunuan ng AFP at Malakanyang nang palabasin nilang sangkot sa *relief and evacuation* ang mga sundalong nasugatan nang salakayin ng BHB ang himpilan ng 901st Brigade sa Villahermosa, Daraga, Albay noong Agosto 8. Ang totoo, ang mga naturang sundalo ay kasalukuyan noong nagbabantay lamang sa kanilang himpilan, na mahigit 20 kilometro ang layo sa Mayon, at malapit na sa hangganan ng Albay at Sorsogon.

Apat na sundalo ang nasugatan sa pananalakay na ito. Ang 901st IBde ang responsable sa maraming pamamaslang at iba pang paglabag sa karapatang-tao sa Albay at Sorsogon. **AB**

## Mga tampok na taktikal na opensiba sa Leyte

*Nakapanayam ng Ang Bayan ang dalawang upisyal ng BHB-Mt. Amandewin Command sa isla ng Leyte nitong Hunyo 2006 hinggil sa mga tagumpay na nakamit nila sa larangan ng armadong pakikibaka. Inilahad nila ang ginawang mga paghahanda at mga naging salik sa likod ng dalawang matagumpay na taktikal na opensiba na inilunsad sa isla ngayong taon—ang reyd sa Albuera noong Enero 6 at ang ambus sa Villaba noong Mayo 5.*

Ang Albuera ay nasa kanlurang Leyte at 14 na kilometro lamang ang layo mula sa Ormoc City. Ang Villaba naman ay nasa hilagang-kanlurang Leyte. Parehong dumaranas ng matinding pyudal at malapyudal na pagsasamantala ang mamamayan sa dalawang bayang ito. Subalit napanday na rin ang mamamayan sa dami, sigla at mga nakamit na



tagumpay sa mga pakikibakang agraryong inilulunsad nila. Bunga nito, lalong lumakas ang kanilang suporta sa rebolusyonaryong kilusan.

Bunsod ng mga pakikibakang inilunsad nila, target ngayon ng mga atake ng militar ang mamamayan sa mga bayang ito. Partikular sa Albuera, nagtayo ang kaaway ng isang lakas-kumpanyang detachment mula sa

19th IB ng Philippine Army. Ang pang-aabuso ng militar ay lalong nagpapatibay sa determinasyon ng masa na suportahan ang BHB.

### Reyd sa Albuera

Matagumpay na nailunsad ng BHB sa ilalim ng Mt. Amandewin Command ang reyd sa himpilan ng PNP sa munisipyo ng Albuera noong Enero 6. Nagulantang ang mga pulis nang biglang tumigil sa harap ng kanilang detachment ang tatlong sasakyang may lulang mga gerilya ng BHB.

Anim noon ang pulis na nasa istasyon—dalawa ang naggugwardya sa pintuan, tatlo ang nasa kusina at ang isa ay nagpunta sa tindahan.

Agad nadakip ang dalawang gwardyang pulis samantalang ang mga nasa kusina at nasa tindahan

ay kumaripas ng takbo.



Agad namang nilimas ng mga Pulang mandirigma ang arsenal ng himpilan. Nasamsam nila ang 32 armas: 20 M16, siyam na .38 rebolber, isang super .38, isang kal .40 pistola at isang .22 na rebolber. Nakakumpiska rin sila ng 98 magasin at mahigit 3,000 bala, bukod sa teleskopyo, *transceiver base radio*, mahahalagang dokumento at iba pang kagamitan. Tumagal lamang nang 25 minuto ang reyd. Ang dalawang dinakip na pulis ay pinakawalan din matapos matiyak na wala silang mabibigat na kasalanan sa mamamayan.

Ayon sa Pulang kumander na namuno sa naturang reyd, si Ka Nado, ang isinagawang pagsalakay ay tugon sa panawagan

ng PKP na maglunsad ng mga taktikal na opensiba para mapabilis ang pagbabagsak sa pasistang rehimeng US-Arroyo. Layunin din nitong kamtin ang hustisya para sa mga biktima ng maraming paglabag ng mga pulis ng Albueria sa karapatang-tao ng mamamayan. Gayundin, layunin ng naturang taktikal na opensiba na konsolidahin ang baseng masa, pataasin ang kakayahang militar ng BHB at magdagdag ng armas para sa lumalaking pwersa ng hukbong bayan.

Bago ang aktwal na paglulunsad ng taktikal na opensiba, naglunsad ng mga pag-aaral para makonsolida sa pulitika at militar ang hukbong bayan at matiyak ang kahandaan nito sa laban. Binuo ng seksyong pampulitika sa platoon ng BHB ang plano para sa konsolidasyon ng hukbo. Bahagi nito ang pag-aaral ng CARHRIHL.

Niresolba rin ang ilang problema at bagahe kaugnay sa pagpapatupad ng naturang operasyon. Tinugunan ang lahat ng pangangailangan, mula sa mga teknikal na



ang pagpapahinto ng mga sasakyan sa kalzada upang magtuluytuloy ang operasyon ng BHB.

Marami ang nagbigay ng pagkain, dagdag na impormasyon at iba pang suporta. Sa tulong ng masa, ligtas na na-kaatras ang mga kasamang hanggang makarating sa *rallying point*.

Ipinagdiwang kapwa ng mga pwersa ng BHB at ng masang magsasaka rito ang matagumpay na reyd.

### Ambus sa Villaba, Leyte

Susi sa tagumpay ng ambus sa Villaba noong Mayo 5 ang masinop na gawaing paniktik at pagpapalano. Ani Ka Icot, isang upisyal ng Mt. Amandewin Command, "Nang matanggap namin ang atas mula sa nakatataas na kumand noong kalagitnaan ng Pebrero, agad nagpuulong ang kumand ng yunit at nagpadala ng grupong paniktik para imbestigahan ang kilos ng kaaway at magtukoy ng mapupusisyanan."

Pagsapit ng Marso 1, nagulat ang grupong paniktik. Agad nagpuulong ang kumand para pag-usapan ang datos na isinumite sa kanila. Matapos ito, nagkaisa ang kumand na maaari nang simulan ng BHB ang paghahanda para sa ambus. Pinabalik ang grupong paniktik para mapalalim pa ang kanilang pag-aaral. Kasabay nito, binuo ng BHB ang kinakailangang istap para mangasiwa sa lohistika, eksplosibo at iba pang kagamitan. Kasabay na inihanda ang mga organisasyon at baseng masa.

Muling nagmiting ang kumand noong unang linggo ng Abril para

aspeto hanggang sa pagpapataas sa pisikal na kakayahan ng mga sasalakay na tropa. Pinatatag ang determinasyon at kahandaan ng mga Pulang mandirigma na ipatupad ang taktikal na opensiba.

Sa paglulunsad ng reyd na walang putok, naipakita ng BHB "kung papaano makakukuha ng armas na walang namamatay o bawas ang namamatay," paliwanag ni Ka Nado. Epektibo ring napabulaanan sa walang putok na reyd ang kasinungalingan ng kaaway na terorista ang BHB.

Tagumpay din ng reyd ang naipakitang lalong paglakas at paglawak ng suporta ng mamamayan sa kanilang hukbo at ang ibayong paglalim ng tiwala nila sa kakayahang militar ng BHB sa paglulunsad ng mga taktikal na opensiba. "Labis na ikinatuwang ng masa ang nakamit na tagumpay. Alam nilang katumbas ng bawat tagumpay na nakakamit ng BHB ang ibayong pagpapahina sa mga kaaway sa uri."

Kabilang sa itinulong ng ilang magsasaka sa operasyon ng BHB

*Sundan sa "Leyte..." pahina 12*



Mga “humanitarian mission” ng US sa Pilipinas

## Instrumento ng panghihimasok

**S**a ilalim ng bagong kasunduan sa pagitan ng Malakanyang at gubyr-nong US na bumuo ng Security Engagement Board (SEB), lalong agresibong isasangkalan ng gubyrnong Arroyo at militar ng US ang mga sakuna at iba pang “di-tradisiyunal na usapin” bilang katwiran sa pa-paraming deployment at panghihimasok ng mga tropang Amerikano sa teritoryo ng Pilipinas sa anyo ng mga “humanitarian mission.”

Lagpas sa lumang Mutual Defense Treaty ng 1954 ang tinaguri-ang mga “di-tradisiyunal na usa-pin”—“terorismo, krimen, kaligta-san at seguridad sa karagatan, mga sakuna dulot ng kalikasan o tao at mga epidemya”—bilang batayan para sa “tulongang militar” ng US at Pilipinas. Ang totoo, dagdag na mga dahilan ito para makapagpapa-sok ng mga tropang militar ang US

sa Pilipinas. Bukod pa ito sa tuluy-tuloy na pagdagsa ng mga sundalo ng US dahil sa pagdaraos ng “*joint military exercises*” sa ilalim ng Visiting Forces Agreement. Paraan lahat ito para ikamuplahe ang kung tutuusi’y permanente nang presen-sya ng mga tropang Amerikano sa bansa at mahawan ang daan sa pagpapatindi ng panghihimasok-militar at pagyurak ng US sa kasa-

rinlan ng bansa.

Ang mga “humanitarian mis-sion” ng US ay gimik lamang para pabanguhin ang imahe at maging katanggap-tanggap ang presensya nila sa mga lugar na may estratehi-kong halaga para sa US. Inilulun-sad ang mga ito sa layuning pata-tagin ang impluwensya at kontrol nito sa bansa, palawakin ang eryang saklaw ng operasyon ng mga tropang Amerikano, ikamupla-he ang isinasagawa nitong “*social and terrain mapping*” at iba pang gawaing paniktik, magrekrut ng

*Sundan sa “Instrumento...,” pahina 13*

### “Leyte...,” mula sa pahina 11

konsolidahin ang mga datos at itak-da ang partikular na plano sa am-bus. Kasabay ng pagtatakda ng pe-tsa ng pag-atake, pana-panahong naghanda ang hukbo. Naglunsad ng tigdadalawang araw na *dry run*. Tini-yak din ang kahandaan ng tim ng mga medik. Sinarbey mismo ng ku-mander ang tereyn. Bukod sa pag-eksakto ng pusisyon sa ambus, iti-nakda rin kung saan pupuwesto ang *blocking force*. Naglunsad uli ng tat-long araw na *dry run*.

Natapos ang lahat ng pagha-handa noong huling araw ng Abril at pinagpasyahang simulan na ang martsa patungong *ambush site* sa mga unang araw ng Mayo.

Sinimulan ang paglalakbay sa hapon ng Mayo 4 at nakarating sa target ang mga Pulang mandirigma bandang alas-11 ng gabi. Natapos ang pagpusisyon bandang alas-6 ng umaga ng Mayo 5. Sa umaga ring iyon, dumating ang target: isang Light Ace na *van* na may lu-

lang limang sundalo. Pero hinayaan lang itong dumaan dahil may naka-sakay na sibilyan. Hinintay nilang bumalik ang kaaway.

Mga alas-11 ng tanghali, ipina-abot ng *monitoring team* na ang sasakyang Light Ace ay pabalik na mula Ormoc City papuntang Villa-ba. Naghanda na ng ambus ang mga Pulang mandirigma. Makaraan ang 30 minuto, ipinaabot ng hu-ling *look-out* na malapit na ang ka-away. Pagdating ng sasakyan sa iti-nakdang *killing zone*, agad itong pinasabugan ng *land mine* at pina-ulanang ng bala. Agarang namatay ang apat na sundalo at nasugatan ang isa pa. Nasunog ang tatlong armas. Kaya dalawang armas na lang ang nasamsam ng BHB.

Hindi maitatwa ang tagumpay ng BHB sa militar at pulitika. Para makapanira pa rin sa BHB, ikinalat ng 19th IB ang intrigang sinunog umano ng mga Pulang mandirigma ang bangkay ng isa sa mga sundalo. Subalit maagap na nagpaliwanag

ang Mt. Amandewin Command na di sinasadyang nasunog ang bangkay ng sundalo. Dahil may karga ang sa-sakyan na 40 litrong gasolina, nag-liyab ang kanilang sasakyan nang mapasabugan ng *land mine*.

“Noong nakaraang mga taon,” dagdag ni Ka Icot, “pabugso-bugso lamang ang paglulunsad ng mga taktikal na opensiba dahil walang tumututok sa gawaing paniktik. Pero ngayong may naitayo nang grupong nag-aasikaso sa panga-ngalap ng impormasyon, pagsasala at pag-aaral nito, mas natitiyak na ang galaw ng kaaway at madalas nang nakapaglulunsad ng mga tak-tikal na opensiba. Sustenido nang nakapaglulunsad ng maraming ma-liliit na taktikal na opensiba at pa-na-panahong may nailulunsad na malalaki. Prayoridad sa pagpili ng target ang pinakasagadsaring mga elementong may matitinding re-kord ng pang-aabuso sa masa at may utang na dugo sa mamamayan at rebolusyonaryong kilusan.” **AB**





**"Instrumento..." mula sa pahina 13**

mga mersenaryo at magbigay ng kinakailangang impormasyon, payo at tulong sa militar ng Pilipinas sa paglaban sa mga armadong rebolusyonaryong pwersa at mga pwersang anti-imperyalista. Inaamin mismo ng AFP na ang US Army ang pinanggagalingan ng datos paniktik na ginagamit nila sa kanilang mga operasyong militar, at sa partikular sa inilunsad nilang operasyon laban sa mga pwersa ng Abu Sayyaf sa Indanan, Sulu nitong unang linggo ng Agosto.

Mula 2004, dumalas ang pagsagpang ng US at gubyernong Arroyo sa malalaking sakuna sa Pilipinas upang magpapasok ng mga tropang Amerikano sa mga apektadong lugar sa anyo ng mga "humanitarian mission." Kabilang dito ang pagpakat ng mahigit 920 sundalong Amerikano sa mga bayan ng Quezon at Aurora noong Disyembre 2004 matapos masalanta ang ilampung libong mamamayan dito ng mga bagyo, baha at pagguho ng lupa. Gayundin, noong Pebrero 2006 ay humigit-kumulang 1,000 sundalong Amerikano ang ipinakat sa Guinsaugon, Southern Leyte kung saan mahigit isang libong mamamayan ang natabunan ng malaking pagguho ng lupa.

Mula naman nitong Mayo, isang buwang dumaong ang US Navy Ship "Mercy" sa mga baybayin ng Zamboanga, Jolo at Tawi-tawi. Mahigit sa 700 mga sundalong Amerikano ang umistasyon sa mga naturang prubinsya sa ngalan ng pagbibigay ng mga serbisyong medikal upang umano'y "lutasin ang ugat ng terorismo." Ang isinagawang pag-istasyon ng mga sundalong Amerikano na may

kasanayang medikal ay kaakibat ng ilang taon nang pamamalagi ng mga armadong tropa ng US sa Jolo at mga kalapit prubinsya para sa sinasabing "joint exercises" kasama ang mga sundalo ng AFP.

Katulad rin ito ng pagdedeploy ng mga pwersang militar ng US sa iba pang bansa sa ngalan ng "pagtulong sa pagsagip at rehabilitasyon" sa nagdaang mga taon. Matapos ang malakas na lindol sa Kashmir, Pakistan noong Oktubre 2005, nagpadala ng mga sundalo ang US doon nang hanggang apat na buwan. Bago ito, 16,000 tropang Amerikano ang idineploy ng US sa Indonesia at Sri Lanka matapos ang malaking *tsunami* na sumalanta sa baybayin ng Indian Ocean noong Disyembre 2004.

Malayang nagagamit ng mga eroplanong militar ng US ang himpapawid ng Pilipinas sa pagdadahilang maghahatid ito ng "relief goods" na hindi na iniinspeksyon ng mga lokal na awtoridad upang tiyakin na walang mga kagamitang militar. Malayang nakagagala sa mga karagatan ng Pilipinas ang mga barkong pandigma ng US sa pagdadahilang maghahatid ng mga tropang Amerikano sa mga lugar ng sakuna.

May ilang pagkakataon sa nakaraang mga taon na gumagala at dumadaong ang mga barkong militar ng US sa Zamboanga at Jolo na lingid sa kaalaman ng mga upisyal ng gubyrno. Dahil magbibigay umano sila ng seguridad sa mga pwersa nito, lantarang nagpalipad ang US ng mga eroplanong pansurbeylans nang dumaong sa Jolo at Tawi-tawi ang USNS Mercy.

Idinidiin dati ng US na dapat tanggapin ang presensya nito sa Mindanao dahil sa interes nitong gamitin ang isla bilang segundaryong lunsaran ng mga operasyon nito sa East at Southeast Asia. Pagsisilbihin ding tuntungan ang Mindanao sa pagpupusisyon ng mga pwersa ng US sa mga lugar kung saan mas malakas ang mga rebolusyonaryo at anti-imperyalistang pwersa. Isa pang dahilan ang pagsusulong ng pang-ekonomyang interes ng US sa Mindanao, laluna sa pagmimina. Subalit ang paglaban sa mga rebolusyonaryong pwersa sa bansa ang siyang pangunahing target ng paparaming panghihimasok at pinaghahandaang direktang agresyong militar ng US sa Pilipinas.

Dapat tutulan ng mamamayang Pilipino ang pagpasok ng mga tropang Amerikano sa bansa, kahit pa ito'y nasa anyo ng paglulunsad ng mga "humanitarian mission." Was-tong igiit na anumang tulong material at pinansyal ay dapat dumaloy sa mga lokal na ahensyang sibilyan o mga independyenteng dayuhang ahensyang makatao tulad ng Red Cross o Red Crescent. Marapat lamang na kumilos ang mamamayan para ilantad ang mga tusong layunin ng militar ng US sa bansa at tutulan ang panghihimasok ng US sa mga panloob na usapin sa Pilipinas.



## Malawakang pagtagas ng langis sa Guimaras

BINATIKOS ng mga grupong nangangalaga sa kalikasan ang gubyernong Arroyo sa di nito paggigiit sa Petron na akuin ang responsibilidad sa paglilinis ng malawakang pagtagas ng langis sa baybayin ng Guimaras. Wasak ang kabuhayan ng libu-libong mangingisda sa isla at nagdulot ng pinsala sa karagatan ang naturang "oil spill" na naganap nang lumubog noong Agosto 11 ang isang barkong kinontrata ng Petron para magdeliber ng dalawang milyong litrong langis dito sa Pilipinas. Dahil dito, nasira ang mahigit isang libong ektarya ng bakawan sa Guimaras. Umaabot sa apat na pulgada ang kapal ng langis na lumulutang sa dagat na pumapalibot sa isla. Apektado na rin ang Negros Occidental sa pinsalang dulot ng "oil spill." Tumatanggi ang Petron na akuin ang buong responsibilidad sa "oil spill" kaya bantulot itong gastusan ang paglilinis sa langis na patuloy na tumatagas mula sa lumubog na barko. Ang Petron ay 40% pag-aari ng Saudi Aramco at 40% pag-aari ng gubyerno ng Pilipinas.

## Paniniktik ng US sa mga tawag sa telepono, labag sa batas

LABAG sa batas ang paniniktik ng National Security Agency (NSA) ng US sa mga usapan sa telepono ng mga Amerikano at mga tao sa ibang bansa kung walang kaukulang kautusan ang husgado para rito. Ito ang tugon ng isang korte sa US sa kasong isinampa ng American Civil Liberties Union laban sa ginagawang "warrantless surveillance" ng NSA. Ayon sa desisyon na inilabas noong Agosto 17, ang "warrantless surveillance" ay labag sa Foreign Intelligence Surveillance Act at sa konstitusyon ng US. Walang kapangyarihan si US Pres. George W. Bush na iutos ito, anang korte. Ginagawa na ng NSA ang gayong paniniktik mula pa noong 2001 subalit nitong Disyembre 2005 lang ito nabunyag sa publiko nang maiulat ito sa isang artikulo sa *New York Times*.

## Sabwatang US-Israel laban sa Lebanon

**H**indi lamang alam ng US ang planong pananalakay ng Israel sa Lebanon noong Hulyo 12. Direkta itong kakutsaba sa pagpapalano at pagpapatupad nito. Buo na ang plano ng US at ng Israel bago pa man maganap ang pagdakip ng mga operatiba ng Hezbollah sa dalawang sundalong Israeli. Ginamit lamang itong sangkalan para simulan ang opensiba, bombahin at wasakin ang mga komunidad sa katimugang bahagi ng Lebanon at sa proseso ay patayin ang daan-daang sibilyan dito.


Itinuturing ng US ang Hezbollah bilang unang linya ng depensa ng Iran at Syria laban sa anumang planong agresyon ng US sa bahaging ito ng rehiyon. Paniniwala ng US na kailangan munang durugin ang kakayahang militar at impluwensya ng Hezbollah sa Lebanon bago maipatupad ang sarili nitong plano na bombahin at okupahin ang Iran at Syria. Katunayan, itinuturing nitong simula ng "pre-emptive strike" ng US laban sa mga

instalasyong nukleyar ng Iran ang pananalakay ng Israel sa Lebanon.

Hindi kataka-taka na sa unang mga araw, tumanggi ang US na magtawag ng tigil-putukan sa kabilang ng malawakang panawagan para rito. Tiwala ang US na madudurog ng mga pwersa ng Israel ang Hezbollah sa loob ng ilang araw at nagtakda pa ito ng pagbisita sa Lebanon pagkatapos ng unang linggo ng pambobomba. Napilitan lamang itong sumang-ayon sa panawagan para sa tigil-putukan matapos ang karumal-dumal na pambobomba ng Israel sa Qana. Gayunpaman, hindi nito kinundena ang pag-atake ng Israel sa Lebanon at ang mga paglabag nito sa tigil-putukan.

Hindi inaasahan ng US at ng Israel na mabibigo ang kanilang mga

plano. Sa loob ng 34 na araw ng tuluy-tuloy na pambobomba, hindi nagawang mawasak ng Israel ang organisasyon at baseng suporta ng Hezbollah. Sa halip, napilitan ang Israel na umatras at ipaubaya sa mga pwersa ng United Nations at Lebanon ang lupaing tinangka nitong okupahin. Umani ng malawak ang galit ng mamamayan ang pamunuan ng gubyerno at militar ng Israel dahil sa mga kabiguan. Dahil dito, nahaharap ngayon sa krisis sa kanyang paghahari ang Prime Minister ng Israel. Sa kabilang banda, idineklara ng Hezbollah na nakamit nila ang makasaysayang estratehi-kong tagumpay laban sa Israel. Tumaa ang prestihiyo at lalo pang lumawak ang suporta para sa Hezbollah hindi lamang sa loob ng Lebanon kundi pati na rin sa mga bansa sa Middle East. **AB**



**ANG****Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XXXVII Blg. 16  
Agosto 21, 2006  
www.philippinerevolution.net

Editorial

## Rehimeng bulok, bulaan at berdugo, dapat na ibasura

**W**alang singgarapal na namang ibinasura ng mga alipures ni Gloria Arroyo sa Kongreso ang kasong *impeachment*. Ni hindi na binigyan ng pagkakataon ang mga nagsampa ng kaso na basahin man lamang ang listahan ng napakaraming naihandang ebidensya ng pandaraya sa eleksyon, korapsyon at pamamaslang sa mga aktibista at iba pang mabibigat na krimen ni Arroyo. Basta na lamang pinatay ng mga kongresistang maka-Arroyo ang kaso dahil wala umano itong batayan.


Ang gayong walang pakundangang paglapastangan sa mga prosesong parlamentaryo at li-gal ay muling nagpapakita ng desperasyon ni Gloria Arroyo na kumapit sa poder. Sa pagbabasurang ito ng kasong *impeachment*, isinara na ng rehimeng Arroyo ang natitirang parlamentaryong prosesong inaasahan ng mamamayan sa ilalim ng kasalukuyang Kongreso para malantad ang mga kasalanan ng rehimen at mapalitan ito. Lalo lamang inilalantad ng rehimeng Arroyo ang sariling kabulukan, kasakiman at katusuhan, at lalo lamang nitong inihihiwalay ang sarili sa mamamayan. Bunga nito, lalong lumalapad ang hanay ng mamamayang naniniwalang wala ngayong ibang mapagpipilian kundi ang dalhin ang laban sa lansangan at sa arma-

dong paraan upang magwakas na ang di lehitimo, korap, papet at brutal na paghahari ni Gloria Arroyo.

Ang pagbasura sa kasong *impeachment* ay pinakahuli lamang sa mahabang serye ng maruruming maniobra at mararahas na atake sa mga pwersang lumalaban sa rehimeng Arroyo.

Kamay-na-bakal ang pangunahing sandigan ni Arroyo upang makapanatili sa poder. Sa pamamagitan ng malawakang pamamaslang at pagdukot sa mga aktibista, mga pinaghihinalaang rebolusyonaryo, iba pang mga kalaban sa pulitika at maging mga inosenteng sibilyan, naghahasik siya ng lagim sa desperadong tangkang paatrasin at durugin ang malawak na kilusan para patalsikin siya.

Lansakang nilalabag ni Arroyo at mga kasapangkat at alipures niya ang mga karapatang sibil sa pamamagitan ng mga pasistang hakbangin at kautusan tulad ng pagbabawal sa mga mapayapang pagkilos at pang-aaresto sa mga nagrurali. Marahas na nililimitahan at binubuwag ang iba't ibang pagkilos ng mamamayan. Ipinadudukot, ipinapapatay o kaya'y ginigipit at ikinukulong ang kanyang mga kalaban. Naghahari ang terorismo ng estado sa malawak na kanayunan at maging sa ilang sentrong bayan at syudad kung saan namamayani ang mga pangunahing pasis-



**Mga tampok sa isyung ito...**

**Super regions:  
Super-pantasya  
ni Arroyo** PAHINA 4

**Kleriko-pasistang  
doktrina ni Intengan** PAHINA 7

**Instrumento ng  
panghihimasok: Mga  
humanitarian mission  
ng US** PAHINA 12

## Mga instruksyon sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*